

己未詞科錄

序

制科之興肇于漢賢良方正文學異等諸科而名目之繁莫過于唐以新舊史及太平御覽文獻通攷等攷之不下七十餘目若雲麓漫鈔所列則多至一百有餘中惟開元十九年博學鴻詞科號爲得人迄乎宋代雖間亦用制科鴻詞等取士大要與科舉無太相遠且名分五等而所取惟列下三等上一二等仍虛其位故士亦不甚以爲重元明以來此科遂廢我

朝

列聖相承文教亶敷明揚側陋

序

聖祖仁皇帝以康熙己未年特開博學鴻詞科以收羅天下賢雋奇才異能之士雖布衣韋帶巖穴幽隱莫不徵求辟薦

上親臨軒制策擢取一二等並寵以清秩纂修明史良緣上用誠求下以實應于是經儒碩彥名臣傑士一時景集蓋自設科取士立賢無方風雲際會之盛從古罕覩至于今雖去之百數十載使人思慕不衰於戲此少司寇小峴秦先生所以有己未詞科錄之輯也先生于宮諭對巖先生實本生高祖家世清門天挺殊異于書無所不窺習聞掌故其爲是書上自

制詔下及奏疏旁采家傳碑誌集錄記載綱舉目張有  
體有要非特詞科鉅觀洵足備昇平之佳話者矣或謂  
先生自高曾以降累世科第領袖縉紳而先生又以詩  
賦起家稔于先世舊聞藉以發揮前業鼓吹休明此猶  
淺之乎闕先生者也從來有天下者必資賢佐唐虞之  
際岳牧咸薦故皋夔元凱布列在位然後成郅隆之治  
三代而還惟漢最爲得人文景武宣世名臣輩出若鼂  
錯董仲舒公孫宏朱雲何武轅固黃霸朱邑之倫並以  
特制科爲天子拔取凡所對策忠言讜論史不勝書降  
及東京賢良節義之士亦多出自此科我

聖祖仁皇帝睿謨淵斷度越古今慮專尙制義不足盡  
收天下英竒特舉千百年之曠典

高宗純皇帝敬天法

祖以乾隆丙辰年復

詔開博學鴻詞科得士亦並一時俊傑繼繼繩繩後先  
輝映迄今流風餘韻猶有存者先生被

兩朝知遇之隆敷歷中外垂數十年蓋深有慕於

聖主賢臣盛德鴻業千載同揆暇日輯爲是書以道揚  
休美俾承學之士咸知讀聖賢書而樂堯舜之道通經  
博學以無負

盛世作人之化此則先生之素志故竊以謂若徒以撫  
遺聞傳軼事如昔人衣冠盛事桐陰舊話之所爲猶淺  
之乎闕先生者也騫山澤耑蒙辱先生命俾之一言謹  
摭其蠡管云爾

嘉慶十二年歲次疆圉單閏九月重陽日海寧吳騫

凡例

余始見嘉興李氏所藏鶴徵錄云係朱氏曝書亭本  
竹垞所欲輯而未成者又嘗見全謝山詞科摭言止  
載一等五十人及同試之高士奇勵杜訥二人加中  
書銜王方穀等七人

特賜中書銜杜越傅山二人其餘同徵諸公俱缺是  
編據鶴徵錄而益廣之間有考證附以按語今鶴徵  
錄已刊刻是編徵引較富或不妨並行與

王阮亭池北偶談云已未詞科由外薦到者共一百  
八十六人方潤仁松廳筆乘云是時大臣科道題薦

八十三人各衙門揭送吏部七十二人督撫外薦三十一人共一百八十六人二公所記名數相符至愚山年譜云同試者一百七十五人竹垞年譜云同徵一百九十餘人則又互異至吳星叟以稽宗孟爲到京與試王阮亭以王鉞爲辭薦不赴俱與鶴徵錄不合他如章貞董俞夏茵宋昱等俱未與試入之與試之列黃宗羲魏禧並未薦薦入之患病行催不到之列鶴徵錄皆誤今雖照原目並附按語辨之

是編辭不就者十二人後期未試者二人舉不及期者一人補遺二人皆鶴徵錄所無從他本採入而李



清實未薦舉詞科故列其名而仍附按語辨之

是編每人志傳墓銘有可考者悉行載入其所著書有採入四庫全書提要者載於志傳墓銘之前其它遺文軼事靡不搜錄旣已纂成十卷續有掇拾復成叢話四卷以補未備閱者幸勿病其體例之雜也或謂諸公詩文宜採入余以百數十人內其有全集者難以摘取其詩文零落者又無從蒐訪故槩遺而不錄

鶴徵錄與試未用者九十七人是編以紀吳王宏撰另入之稱疾不與試之列與試未用者止九十五人

合之仍九十七人也未用諸人名次前後隨手編入  
是以與鶴徵錄不符高士奇勵杜訥二人据詞科摭  
言增入未試病故者增郁植一人

已未詞科錄卷首

康熙十七年正月二十二日奉

上諭自古一代之興必有博學鴻儒振起文運闡發經史潤色詞章以備顧問著作之選朕萬幾餘暇遊心文翰思得博洽之士用資典學我朝定鼎以來崇儒重道培養人材四海之廣豈無奇才碩彥學問淵通文藻瑰麗可以追蹤前哲者凡有學行兼優文詞卓越之人不論已仕未仕在京三品以上及科道官員在外督撫布按各舉所知朕將親試錄用其餘內外各官果有真知灼見在內開送吏部在外開報督撫

代爲題薦務令虛公延訪期得真才以副朕求賢右文之意爾部卽通行傳諭遵行特諭欽此

康熙十八年正月十七日奉

上諭吏部朕以萬幾時暇畱心經史思得博學鴻儒備顧問著作之選故特頒諭旨令內外諸臣各舉所知薦人員已經陸續到部欲行考試因天寒晷短恐其難於屬文弗獲展厥蘊抱今天氣漸已融和應定期考試所有合行事宜爾部具奏特諭欽此

康熙十八年二月十九日吏部爲欽奉

上諭事該

臣

等議得考試之期恭候

皇上欽定其各薦舉人員俱令於考試之先赴部投供  
臣等公閱內有真正年老有病不能動履者具題  
請

旨應考人員俱於

欽定之日黎明吏部官帶赴各官行禮處排班齊集題

目內閣請

旨出題後內閣大臣或翰林院學士捧至

太和殿前黃案設放畢鴻臚寺官指引各考試人員  
行三跪九叩頭禮畢翰林院官捧題下階令考試  
官員跪翰林官給題吏部官散卷畢帶赴

體仁閣下考試試卷桌張等項由翰林院行文該部  
備辦將考試官員照例彌封考試照

殿試例每名著擺呀嚨監試作完試卷吏部官收接  
交翰林院官一總固封進呈

御覽其已取之人作何錄用之處候

旨遵行

康熙十八年三月初一日

召試於

體仁閣

試題

璿璣玉衡賦 四六序

省耕詩 五言排律二十韻

閱卷官

大學士戶部尚書李蔚 字臺書號坦園直隸高陽人順治丙戌進士謚文勤

大學士禮部尚書杜立德 號純一 直隸寶坻人崇禎癸未進士謚文端

大學士刑部尚書馮溥 字孔博號易齋山東臨朐人順治丁亥進士謚文毅

掌院學士禮部侍郎葉方藹 字子吉號訥庵江南崑山人順治己亥進士謚文敏

康熙十八年四月初六日奉

上諭吏部薦舉到文學人員已經親試其取中二等二

十人彭孫遹倪燦張烈汪霏喬萊王頊齡李因篤秦

松齡周清原陳維崧徐嘉炎陸萊馮勗錢中諧汪楫  
袁佑朱彝尊湯斌汪琬邱象隨二等三十人李來泰  
潘耒沈珩施閏章米漢雯黃與堅李鎰徐鉉沈筠周  
慶曾尤侗范必英崔如岳張鴻烈方象瑛李澄中吳  
元龍龐塏毛奇齡錢金甫吳任臣陳鴻績曹宜溥毛  
升芳曹禾黎騫高詠龍燮邵吳遠嚴繩孫俱著纂修  
明史其見任候補及已仕未仕各員作何分別授以  
職銜其餘見任者仍歸原任候補者仍令候補未仕  
者俱著回籍內有年老者作何量給職銜以示恩榮  
爾部一併詳議具奏告病者不必補試特諭欽此



吏部

題爲欽奉

上諭事該臣等議得薦舉文學人員已經考取奉

旨纂修明史人員內汪霖見任行人司行人喬萊見任  
內閣辦事中書王頊齡見任太常寺博士陸萊見  
任內閣典籍袁佑見任內閣辦事中書曹禾見任  
內閣辦事中書此六員係見任京官停其給與職  
銜以原官修史如遇陞授考選京缺照常陞考補  
授仍令修史若遇陞外缺停其陞授令其修史俟  
纂修告成之日一併酌量再議錢中諧新授湖廣

瀘溪縣知縣汪楫見任贛榆縣教諭李鎧見任蓋平縣知縣此三員係見任在外任官應開缺另補將伊等以原官停其外陞修史既將伊等停其外陞俟纂修告成之日從優議敘彭孫適候選主事張烈沈珩俱候選內閣中書米漢雲周慶曾俱候補主事方象瑛候選中行評博邵吳遠候補京堂此七員見候京缺之員停其另給職銜仍照伊等應補職銜食俸修史如遇應補之缺照常挨次補授仍令修史補授後照見任官員例行李來秦施閏章俱候補參議道黃與堅候選知縣尤伺由推官

降二級調用高詠候選知縣徐嘉炎龍燮俱候選  
州同此七員係候外缺之官不便補授令其前去  
應將伊等停其補授以原官併所降之級修史俟  
告成之日從優議敘湯斌原任參政道降三級調  
用因患病休致應以所降之品修史俟告成之日  
酌量議敘汪琬原任戶部主事回籍調理今應以  
主事職銜修史吳元龍原任工部郎中回籍終養  
應以郎中職銜修史俟纂修告成之日將伊等酌  
量議敘秦松齡原任翰林院檢討革職之後保舉  
發往湖廣軍前候用今考試修史應給與原職銜

修史侯告成之日其錄用之處再議沈筠浙江進士錢金甫江南進士此二人應給與內閣撰文中書之銜修史倪燦江南舉人范必英直隸舉人崔如岳直隸舉人龐塏直隸舉人此四人應給與內閣辦事中書之銜修史陳鴻績係革職知縣邱象隨江南拔貢李澄中山東拔貢毛升芳浙江拔貢黎騫江西貢生李因篤陝西布衣周清原江南監生陳維崧江南生員馮勗江南布衣朱葵尊浙江布衣潘耒江南布衣徐鉉江南監生張鴻烈江南廩監毛奇齡浙江廩監吳任臣浙江生員曹宜溥

湖廣蔭監生嚴繩孫江南布衣此十七人應給與翰林院待詔之銜修史內有應鄉試會試者仍准赴試此給與職銜之人俟修史告成之日其錄用之處再議除在京見任官員照常食俸無庸議外其餘人員俟修史起日交與戶部給俸伊等既奉旨修史俟

命下之日將各人員職名開寫交送內閣翰林院其回籍之人內驗看直隸歲貢生王方穀江南廩監生申維翰江南增廣生員朱鍾仁浙江生員王嗣槐江南布衣鄧漢儀王昊陝西布衣孫枝蔚俱已年

老均應給與司經局正字之銜以示

恩榮仍知照該督撫至告病人員既奉

旨不必補試則丁憂及咨取未到人員俱應停其來京  
可也奉

旨這薦舉取中人員俱授爲翰林官應給職銜著再議  
具奏杜越傅山及王方穀等文學素著念其年邁從  
優加銜以示恩榮俱授以內閣中書銜餘依議

題爲欽奉

上諭事該

臣

等再議得薦舉取中人員內邵吳遠浙江

進士係學道內升以京堂錄用之員應額外授爲

侍讀李來泰江南進士候補參議道施閏章江南  
進士原任江西湖西道吳元龍江南進士原任工  
部郎中因終養回籍湯斌河南進士原任參政道  
降三級調用因患病休致將此五員應額外授爲  
侍講伊等若遇陞缺以侍讀侍講等論俸陞授仍  
令纂修明史彭孫適浙江進士候選主事張烈順  
天進士候選內閣中書汪霽浙江進士見任行人  
司行人喬萊江南進士見任內閣辦事中書王頊  
齡江南進士見任太常寺博士陸萊浙江進士見  
任內閣典籍錢中諧直隸進士原選瀘溪縣知縣

袁佑直隸拔貢見任內閣辦事中書汪琬江南進士原任戶部主事告病回籍沈珩浙江進士候選內閣中書米漢雯直隸進士候補主事黃與堅江南進士候選知縣李鑑江南進士原任葢平縣知縣沈筠浙江進士周慶曾江南進士候補主事方象瑛浙江進士候選中行評博錢金甫江南進士曹禾江南進士見任內閣辦事中書將此十八員應授爲編修倪燦江南舉人李因篤陝西布衣秦松齡江南進士原任翰林院檢討革職保舉湖廣軍前候用周清原江南監生陳維崧江南生員徐



嘉炎浙江監生候選州同馮勗江南布衣汪楫江  
南拔貢見任江南贛榆縣教諭朱燹尊浙江布衣  
邱象隨江南拔貢潘耒江南布衣徐鉉江南監生  
尤侗江南貢生原任推官降三級調用范必英直  
隸舉人崔如岳直隸舉人張鴻烈江南廩監李澄  
中山東拔貢龐塏直隸舉人毛奇齡浙江廩監吳  
任臣浙江生員陳鴻績浙江舉人原任睢寧縣知  
縣革職曹宜溥湖廣廩監毛升芳浙江拔貢黎騫  
江南貢生高詠江南貢生候選知縣龍燮江南例  
監候選州同嚴繩孫江南布衣應將此二十七員

授爲檢討俱令纂修明史查編檢原無定額其陞

轉時俱論科分次序令伊等若遇陞轉員缺與見

任編檢將此授編檢年次較論陞授仍令修史奉

旨邵吳遠授爲侍讀湯斌李來泰施閏章吳元龍授爲

侍講彭孫遹張烈汪霏喬萊王頊齡陸棻錢中諧袁

佑汪琬沈珩米漢雯黃典堅李鐸沈筠周慶曾方象

瑛錢金甫曹禾授爲編修倪燦李因篤秦松齡周清

原徐嘉炎馮勗汪楫朱彝尊邱象隨潘耒徐鉉尤侗

范必英崔如岳張鴻烈李澄中龐塏毛奇齡陳鴻績

曹宜溥毛升芳黎塞吳任臣陳維崧高詠龍燮嚴繩

孫授爲檢討餘依議

特賜同博學鴻儒科二人

在南書房賦詩一首

高士奇

勵杜訥

特授內閣中書年老者七人

邱鍾仁

王方穀

申維翰

王嗣槐

鄧漢儀

王昊

孫枝蔚

特授內閣中書臨試告病者二人

傅山

杜越

丁憂未與試者十四人

曹溶 汪懋麟

黃虞稷 王穀韋

陳學夔 戴王綸

林以畏 陸隴其

惠周惕 張貞

錢芳標 彭桂

柯崇樸 柯維楨

未試病故者三人

葉舒崇 郁植

陳九勝

未試致仕者一人

祝宏坊

患病行催不到者十四人

應撝謙

張新標

范鄒鼎

王追騏

嵇宗孟

蔡方炳

陸舜

李容

黃宗羲

張九徵

魏禔

顧景星

顧豹文

章貞

中途告病不與

到京稱疾不與試者二人

紀炅

王宏撰

與試未用者九十五人

閻若璩

田雯

嵇永福

吳雯

楊還吉

馮雲驥

畢振姬

顧鼎銓

葉封

陳玉璣

陳僖

孫棨

李念慈

吳農祥

張瑞徵

許先甲

趙進美

陸元輔

王念真

任辰旦

陸次雲

許自俊

魏學渠

儲方慶

周之道

鄧林梓

李良年

江闔

白夢鼎

林堯英

葉灼棠

葉奕苞

田茂遇

馮行賢

王祚興

徐林鴻

羅坤

楊毓蘭

黃始

宋維蕃

金居敬

王岱

施清

高層雲

張英

宋實穎

譚吉璫

王孫蔚

毛際可

王紫綬

上官鑑

法若真



王廷璧

李大春

徐咸清

傅展

侯七乘

張霍

成其愿

宋昱

徐懋昭

陶元淳

王鉞

董俞

李芳廣

潘颺言

徐之凱

徐肅芳

趙廷錫

潘藩大

張含輝

郎載瓚

李瑞徵

陳笑

葉方蔚

許蓀荃

程大呂

程必昇

趙驪淵

陳宏

陳懷真

高向台

宋涵

馬駿

朱培

程易

朱士曾

劉瑞遠

戴茂隆

李開泰

邵允葵

林鵬

張能鱗

周起莘

趙廷颺

辭不就者十二人

顧炎武

王揆

徐一

聞性道

萬斯同

王曾武

李清

仲治

胡周鼎

馮京

崔華

費密

後期未試者二人

夏駟

方象璜

舉不及期者一人

姜宸英

補遺二人

辭薦  
不就

周容

錢肅潤

已未詞科錄卷一

通議大夫廣東提刑按察使司按察使無錫秦瀛輯

紀事

康熙十七年吏部奉

上諭特開制科以天下才學官人文詞卓越才藻瑰麗者

召試擢用備

顧問著作之選名爲博學鴻詞科

敕內外大臣各薦舉來京先是二年間

上厭薄八比已

諭內三院九卿于甲辰丁未兩科改換策論着以經濟  
時務取士

廷臣皆言古學不可猝辦仍暫用八比以俟徐復因特  
開是科振厲其事

按制科始于兩漢皆朝廷親試不涉有司歷漢魏六朝  
唐宋不改惟唐試科不一遂分制科與進士及明經諸  
科爲二然惟親試者得稱制科又謂之大科餘皆非是  
也自元明專用進士一科不用制科卽有薦舉擢用如  
賢良方正等皆不經召試有薦舉而無科目因誤以進  
士科爲制科且以八比文爲制舉文而典制與名稱俱

失之矣至是始開科實別于八比而世仍未之曉也  
是時相傳爲博學鴻詞科按博學鴻詞爲前代科名此  
並非是但世不深考不曉鴻儒所自出遂以鴻詞當之  
卽同試與同籍諸公亦尚有自署其銜爲鴻詞者不知  
鴻儒二字出自董仲舒繁露有云能通一經者曰儒生  
博覽羣書者號曰洪儒故其後作陋室銘者曰談笑有  
鴻儒鴻卽洪也猶古洪水稱鴻水也

是年十一月初一日大學士索額圖明珠奉

旨各大臣官員題舉才學官人俟全到之日考試其中  
恐有貧寒難支者交與戶部酌量給與衣食用以副朕

求賢重文之意戶部議帖給俸廩併柴炭銀兩按月稽  
領真曠典也

十八年己未正月晦日

上諭薦舉人員著二月初三日親試高陽李師奏時日  
迫促不能預備試卷桌子等項遂

諭十六日啓奏時

幸溫泉回益都馮師又簡入會闈作主文官未啓奏閒  
十七日傳

諭著該部同翰林院確定試日並應用事宜具奏因定  
三月初一日至是日平明齊集



太和門以魚貫入詣

太和殿前鴻臚唱行九叩頭禮畢是日

上御殿祭

堂子回命諸薦舉人員赴

東體仁閣下太宰掌院學士捧題出用黃紙十張上寫  
題二道放黃幘桌上跪領題訖用矮桌列墀下坐地作  
文及已牌太宰掌院學士復宣

旨云汝等俱係薦舉人員有才學的原不必考試但是  
考試愈顯你們才學所以

皇上十分敬重

特賜汝宴凡是會試殿試館試狀元庶吉士俱沒有的  
汝等要曉

皇上德意宜訖命起赴

體仁閣設高桌五十張每張設四高椅光祿寺設饌十  
二色皆大盤高攢相傳給訖四百金先

賜茶二通時果四色後用饅首卷子紅綾餅粉湯各二  
套白米飯各一大盂又

賜茶訖復就試時陪宴者太宰滿漢二員掌院學士滿  
漢二員皆南北向坐謂之主席以賓席皆東西向也餘  
官提調者皆不與焉其夕晚出者十餘人皆給燭竣事

然後彌封諸試卷作四封當夜呈

進

先試一日

上命內閣諸學士及翰林院掌院擬題皆一文賦一詩  
高陽李師擬璿璣玉衡賦賦得雨中春樹萬人家寶坻  
杜師擬王者以天下爲一家論省耕詩益都馮師擬十  
三經同異考耕籍詩內閣學士項公擬士先器識而後  
文藝論賦得春殿晴薰赤羽旗閣學李師擬岫嶠碑贊  
遠人向化歌掌院學士葉師擬珪璋特達賦三江九江  
攷賦得龍池柳色雨中深

上用高陽師賦題寶坻師詩題

試之次日

上攜卷至霸州觀魚貯以黃絹箱至初十日大風帳房  
內

親看抽四卷出其一卽予卷且夾一紙籤于卷中

御書女媧事三字以予賦詞有云日升于東匪彎弓所  
能落天傾于北豈鍊石之可補疑鍊石句不經將以  
詢諸大臣也時以大風起不終閱仍入箱訖十四日還  
宮十五日發卷出中堂三相公暨掌院學士參閱十六  
日閱訖十七日啟奏

呈繳照前代制科等第進士科分甲乙例判作四等曰  
上上曰上曰中曰下時閱卷者見予卷紙籤不知所謂  
且疑

上不善其詞三相公欲置之上卷之首而掌院踟躕曰  
第置上卷末伺

皇上意旨何如耳會二十日

殿試二十二日中堂掌院俱作讀卷官

上諭前所試上上卷上卷著人史館纂修明史餘俱遣  
回其年老者量加虛銜未到者不再試亦不必令來遂  
問有不完卷的何以列在中卷眾答曰以其賸詞可取

也又

問上上卷內有驗于天者不必驗于人語無礙否

彭孫適文

眾答曰雖意圖語滯然故無礙也又

問有或問于予曰及唯唯否否語豈以或指朕予自指

耶

汪琬文

眾答曰賦體本有子虛亡是之稱大抵皆寓言

似不必有實指也

問有女媧補天事信否益都師曰在列子諸書有之似乎可信

上曰朕記楚詞亦有之但恐燕齊物怪之詞不宜入正賦否益都師曰賦體本浮夸與銘頌稍異似可假借作

鋪張者

上曰如此則其文頗佳今在何等答曰已置之上卷末上命稍移在上卷中嗟乎予實不才且是日腕脹全不盡生平所長不知何以猥蒙

聖眷如此及折卷

上又曰詩賦韻亦學問中要事何以都不檢點賦韻且不論卽詩韻在取中中者亦多出入有以冬韻出官字者

潘耒卷

有以東韻出逢濃字者

李來泰卷

有以支韻之旗誤

出微韻之旂字者

施閏章卷

此何說也眾答曰此緣功令久

廢詩賦非家絃戶誦所以有此然亦大醇之一疵也今

但取其大焉者耳

上是之遂定爲五十卷上上卷二十作一等上卷三十作二等餘中卷下卷分作三等四等者總名爲下第不填榜內至拆卷畢因于上卷中斥去一卷

上命擇一有名者補之時中堂掌院各有所薦皆不允最後益都師以徐咸清薦

上曰有著作乎曰有資治文字若干卷

上曰資治文字何書也曰字書也傷一學士曰字書小學耳遂置不問後

上自取嚴繩孫卷補之



二十四日

上諭吏禮二部這取中人員該授何職着確議具覆時  
二部不諳舊制科例但擬已仕者照見任品級或陞或  
加級其去任在籍者或宜起用或宜在籍加銜一應未  
仕者俱授翰林院待詔具覆

上命閣臣取前代制科舊例來閱查得兩漢授無常職  
晉上第授尚書郎唐制策高者特授以尊官其次等出  
身因之有及第出身之分宋制分五等其第一第二等  
皆不次之擢第三等始爲上等恩數比廷試第一人第  
四等爲中等比廷試第三人皆賜制科出身第五等爲

下等賜進士出身

上乃降旨這薦舉取中人員俱授爲翰林官應給職銜  
著再議具奏其杜越傅山王方穀等文學素著念其年  
邁從優加銜以示恩榮于是已仕者俱照品級授講讀  
官坊編修等其未仕者概授檢討總充史館纂修明史  
其杜越等俱授內閣中書聽其回籍依議乃擇四月二  
十日到任各朝服頂帶于欽天監火神廟齊到衙門行  
禮畢次日遂赴史館後同籍五十人集于眾春園做題  
名故事各賦詩一首施愚山爲之序

節錄毛奇齡制  
科雜錄八條

接待以來不敢恩門墻忽忽逾月伏聞

御批有薦舉人員著候到齊之日考試之

旨

聖恩汪濊屢沛

溫綸張八紘之網集四海之士卽累月浹歲沒齒餘榮  
豈草莽臣所敢言抑寒蟲羈鳥有迫而欲鳴者敢以獻  
于閣下竊聞

聖主哀一夫之不獲仁者胥萬物使得所計天下被薦  
者內外出處凡百八十餘人除丁憂准免者九人見在  
驗到者百三十一人續到者七八人物故者四人題名  
不到奉

旨續催及未經查明題報者共二三十人以所部敦促  
上道火烈雷迅度必有疲癯衰疾實不能起者今之者  
舊如傅山杜越年垂耄耄病不能興馬鼻以監督馳臥  
國門外亦可見

天朝之曠典莫敢不舉踵希風矣昔燕昭以一國之主  
築臺以尊郭隗而樂毅劇辛鄒衍之徒畢至矧

天子至尊以禮爲羅其誰不環嚮而輻輳然堯舜在上  
下有巢由不以損唐虞之盛彌足以彰堯舜之大蓋物  
情故不齊也今必比而齊之秦楚閩越文檄往還非兩  
月不達說者謂冬月沍寒短景孟春凍未解二月又舉

禮闈非三四月不暇及此四方寒素之士多不敢過望  
作持久計竝謂八月赴限九月

陞試取進止今有就食畿輔他縣者有寄宿僧廬者以  
芻蕘之愚伏計

皇上回鑾在陽月中旬倘久霽冬和或尙可炙硯一試  
其年餘七十有疾者禮有憲老之典或從寬免其試而  
見放者猶可歸田卒歲閣下膺

天寵寬渥夙夜侍

殿陞試從容乘閒言及未必不

霽顏嘉納如水乳之相投也往歲西南游警

皇上萬幾之暇吟誦如儒生今聞天殪元凶魚潰蠡駭  
鯨海波平

南顧之憂稍釋及此

憑軒策士使天下應

詔大小臣工布衣野老受簡進言卽不逮董賈揚班亦  
可以歌咏盛事垂諸竹素始徵之甚渴旣待之甚溫不  
忍終置之經年逾歲之久亦所以宣

曠恩光盛舉也倘末議可采閣下其俯擇之

施閏章學  
餘堂文集

康熙十有七年春

天子法古制科取士

詔在廷諸臣暨外督撫大吏各舉博學之彥毋論已仕未仕徵詣

闕月給太倉祿米明年三月朔

召試

太和殿廷發題賦序詩各一首學士院散官紙光祿布席

賜讌

體仁閣下於時無錫嚴君繩孫成省耕一詩而退賦序置不作也

天子擢五十人纂修明史部議分資格進士出身者以

館職用餘給待詔銜俟史成日授官

詔下五十人齊入翰苑布衣與選者四人除檢討富平李君因篤吳江潘耒予及嚴君也嚴君文未盈卷特爲天子所簡尤異數云未幾李君疏請歸田養母得旨去三布衣者騎驢入史局卯入申出監修總裁交引相助越二年

上命添設日講官知起居注八員則三布衣悉與焉是秋予奉

命典江南鄉試嚴君亦主考山西比還歲更始正月幾望



天子以逆藩悉定置酒

乾清宮飲讌近臣

賜坐殿上樂作羣臣以次奉觴上

壽依漢元封柏梁臺故事

上親賦昇平嘉讌詩首唱麗日和風被萬方之句嚴君  
與潘君繼和

御製序文勒諸石二月潘君分校禮闈卷三布衣先後  
均有得士之目而館閣應奉文字院長不輕假人恆屬

三布衣起草

朱彝尊曝  
書亭集

瀛按康熙辛酉添設日講官起居注八員鴻博科

與者六人先官諭與嚴中允與焉是秋各省鄉試  
主考多用鴻博科諸公先官諭主江西中允主山  
西甲子先官諭遂首典順天鄉試

康熙十七年內閣奉

上諭求海內博學鴻詞之儒以備顧問著作時閣部以  
下內外薦舉者一百八十六人十八年三月朔

御試

體仁閣下中選者彭孫遹等五十人有

旨俱以翰林用開局編修明史候補少卿一人邵吳遠  
改侍讀監司湯斌李來泰施閏章三人郎中吳元龍一

人改侍講進士彭孫通中書舍人袁佑等授編修貢舉  
監生生員布衣倪燦等授檢討以原任翰林院掌院學  
士徐元文爲監修官翰林院掌院學士葉芳謫右春坊  
庶子兼侍講張玉書爲總裁官開局內東華門外又云  
己未鴻博之徵內外薦剡百八十餘人不至者四人浙  
江應撫謙嗣寅江西魏禧冰叔山西范鄩鼎彪西陝西  
李容中孚范登順治辛丑進士闡明絳州辛復元全先  
生之學與應李以理學著于南北唯魏以古文擅名其  
兄際瑞弟禮皆有詩名時號寧都三魏

王士禎池  
北偶談

已未

召試博學鴻才內外薦舉到京者五十九人戶部給與  
食用十八年三月初一日除老病不能入試外應試者  
五十人先行

賜宴後方給卷

頒題璿璣玉衡賦省耕詩二十韻讀卷李高陽相國  
杜寶坻相國立德馮益都相國溥葉掌院學士方藹取  
中一等二十名二等三十名奉

旨邵吳遠授爲侍讀湯斌李來泰施閏章吳元龍授爲  
侍講彭孫通張烈汪霏喬萊王頊齡陸棻錢中諧袁佑  
汪琬沈珩米漢雯黃與堅李鎧沈筠周慶曾方象瑛錢

金甫曹禾授爲編修倪燦李因篤秦松齡周清原陳維  
崧徐嘉炎馮勗汪楫朱彝尊邱象隨潘耒徐鉉九侗范  
必英崔如岳張鴻烈李澄中龐塏毛奇齡吳任臣陳鴻  
績曹宜溥毛升芳黎騫高詠龍燮嚴繩孫授爲檢討俱  
入翰林其年邁回藉者杜越傅山王方穀朱鍾仁申維  
翰王嗣槐鄧漢儀王昉孫枝蔚俱授內閣中書舍人猗  
歟休哉掄才之典於斯爲盛

劉廷璣在  
園雜誌

康熙戊午正月二十三日

上有薦舉博學鴻儒之

詔于是在京三品以上及翰詹科道官在外督撫藩臬

各舉所知以應計北直與薦者十有九人江南與薦者五十有八人浙江與薦者四十有七人山東與薦者十有二人山西與薦者十有一人河南與薦者四人湖廣與薦者六人陝西與薦者十人江西與薦者四人福建與薦者二人貴州與薦者一人次年三月初一日

上御

體仁閣

臨軒命題學士捧黃紙唱給首題璿璣玉衡賦有序用四六次題省耕詩五言二十韻散訖

命就坐撤護軍俾吟咏自適日中鴻臚引出跪聽

上諭云諸士皆讀書博古當世賢人

朕隆重有加宿命光祿授餐使知敬禮至意引上閣設  
席

賜椅四人一席繡衣捧茶陳饋十二簋加四飯豐腆苾  
芬緝御恭肅

詔二品三人陪宴既畢叩頭謝

恩從容握管文完者先出未完者

命給燭至漏二下始罷吏部收卷翰林院總封

進呈

御覽讀卷者相國李蔚杜立德馮溥掌院學士葉方藹

取中一等二十名二等三十名皆受翰林職令入館纂修明史其有舉到在京老病不能入試及入試而不與選者年近七十以上加中書正字等銜以寵之此一代掄才盛典故備記如右

王應奎柳南隨筆

康熙十七年正月二十二日奉

上諭四海之廣豈無奇才碩彥學問淵通文藻瑰麗可以追踪前哲者凡有學行兼優文詞卓越之人無論已任未任著在京三品以上及科道等官員在外督撫布按各舉所知于是內外薦舉幾及二百人十八年正月晦日傳



上諭欲于二月初三日親試大學士李蔚以時日迫促一切事宜未及豫備遂定以三月初一日

親試

命大學士內閣學士掌院學士擬題

上用高陽賦題寶坻詩題

命于

體仁閣下特

賜宴吏部尙書郝惟訥掌院學士葉方藹傳

諭云汝等俱有才學元可不必考試但考試正以顯其才學所以

皇上敬重特

賜宴爲向來殿試所無汝等須悉

皇上德意宜訖各赴宴吏部尙書掌院學士主席諸微  
士席東西向主席南北向是日給燭竣事彌封諸試卷  
當夜呈

進次日

上至霸州攜卷以行十四日還

宮十五日

命大學士掌院學士閱卷十七日進

呈分爲四等日上上日上日中日下二十二日拆卷取

定上上卷彭孫通等二十人上卷李來泰等三十人上  
上卷作爲一等上卷作爲二等俱授爲翰林官外官自  
道以上內官自郎中以上授講讀進士以上授編修餘  
俱授檢討杜越傅山王方穀等九人以年老加  
恩授以內閣中書銜又

特賜高士奇勵杜訥入同博學鴻詞科乃擇四月二十  
日

命五十人到任次日到史館纂修明史

全祖望詞  
科撫言

博學鴻詞科始於唐開元十九年先是開元二年有文  
儒異等科六年有博學通議科七年有文辭藻麗科登

第者爲鄭昉陶翰天寶元年開文詞秀逸科六年又開風雅古調科十三年又開辭藻宏麗科後建中元年又開文辭清麗科貞元元年以後屢開博通墳典達於教化科而博學鴻詞科爲特重新舊唐書於開元以後雖不載某宗某年舉行然如陸贄杜黃裳如柳宗元劉禹錫王涯之徒俱中博學鴻詞科而韓愈與崔斯立書云二試於吏部一旣得之而又黜於中書則韓子一身已經二次舉行矣宋仁宗時以十科取士而博通墳典次于賢良方正之下哲宗紹聖時罷制科目二年乃置鴻詞以繼賢良之科徽宗大觀四年改爲詞學兼茂科高

南渡後仍立博學鴻詞科而其制少異題凡制誥詔表露布檄箴銘贊頌序子內雜出六題分爲三場天子親策得人最盛如周必大周茂政諸人外洪遵洪子洪邁先後俱中是選上以爲洪皓之子忠孝報也後嘉禾時真德秀留元剛應選有司書德秀卷曰鴻而不博元剛卷曰博而不鴻上命俱寘異等則寶祐以前宋制常行是科者矣元明以來廢而不舉我

朝康熙十七年

聖祖患時文之弊因特開博學鴻詞之科網羅天下英異之士

親試

體仁閣下得彭孫通以下五十人理學儒林名臣碩輔皆出其中人文之盛爲本

朝設科之冠擬之唐宋蓋遠過云按制科始於兩漢皆朝廷親策不涉有司歷唐宋不改故爲制科又謂之大科自元明專用進士雖有薦舉不經召試因誤以進士科爲制科則制科之稱惟賢良方正與博學鴻詞始克稱焉典如此其鉅也而宋時葉適則又以旣爲鴻辭其人己自絕於道德性命之本統而若以天下之所能者盡於區區曲藝中矣夫適之所譏以當時投牒求試而

所試之文祇求工於四六對偶故極其流弊不免騫華而忘實也若其人本無干進之心而內外大臣交章薦辟已不同於投牒求試者矣而

天子臨軒問以經史有用之實學文章體制務期樸茂醇雅鴻大簡直而辭華風采其餘事焉安見有體有用之人不得與賢良方正者並出於科目中邪予按前古而得其大畧如此後之人取而攷焉可以知制科之實也

沈德潛博學鴻詞攷

康熙十七年薦舉博學鴻詞一百八十六員赴部驗到一百三十一員法若真山東高密人順治丙戌進士原

江南布政使今候補施閏章江南宣城人己丑進士原  
江西湖西道參議今候補曹禾江南江陰人康熙甲辰  
進士原內閣辦事中書今候補陳玉璣江南宜興人丁  
未進士見任中書科中書米漢雯直隸安化人辛丑進  
士原河南長葛縣知縣行取今候補主事沈珩浙江海  
寧人甲辰進士候選內閣中書汪琬江南長洲人乙未  
進士原戶部山西司主事告病回籍陳維崧江南宜興  
人生員趙進美山東益都人前庚辰進士見任河南河  
北道參政秦松齡江南無錫人乙未進士原翰林院檢  
討革職保舉湖廣軍前候用九侗江南長洲人拔貢生



原直隸永平府推官降調吳農祥浙江仁和人生員王  
頊齡江南華亭人丙辰進士見任太常寺博士李開泰  
順天大興人丙午舉人倪燦江南上元人丁巳舉人田  
雯山東德州人甲辰進士原任工部營繕司郎中今候  
補陸棐浙江平湖人丁未進士原內秘書院典籍今候  
補方象瑛浙江遂安人丁未進士候選中行評博朱彝  
尊浙江秀水人布衣湯斌河南睢州人壬辰進士原江  
西嶺北道參政降調休致葉封湖廣黃岡人已亥進士  
原西城正指揮今候補主事王岱湖廣湘潭人舉人見  
任京職武學教授傅山山西太原人布衣馮行賢江南

常熟人布衣林堯英福建莆田人辛丑進士見任戶部  
江西司主事陳僊直隸清苑人拔貢徐鈞江南吳江人  
監生羅坤浙江會稽人監生彭孫適浙江海鹽人已亥  
進士候選主事陸元輔江南嘉定人布衣畢振姬山西  
高平人丙戌進士原湖廣布政使休致馮雲驤山西代  
州人乙未進士見任四川司郎中白夢鼎江西江寧人  
庚戌進士見任大理寺左評事王紫綬河南祥符人丙  
戌進士原浙江糧道參政休致張烈順天大興人庚戌  
進士候選內閣中書杜越直隸南宮人貢生紀昞直隸  
文安人生員李來泰江西臨川人壬辰進士原江南蘇

松道參議今候補袁佑直隸東明人拔貢見任內閣辦事中書高層雲江南華亭人丙辰進士候選中行評博譚吉璉浙江秀水人例監原陝西延安府同知今陞山東登州府知府孫棨浙江嘉善人舉人現任直隸開州知州陳鴻績浙江鄞縣人原江南睢寧縣知縣革職江閩貴州貴陽人已酉舉人候選知縣王鉞山東諸城人已亥進士原廣東西寧縣知縣休致趙廷錫陝西膚施人進士原順天府良鄉縣知縣今候補內閣中書李念慈陝西涇陽人戊戌進士見任湖廣景陵縣知縣徐懋昭浙江鄞縣人甲辰進士見任河南沛縣知縣高詠江

南宣城人貢生李澄中山東諸城人拔貢陳懷真山東  
兗州人貢生黎騫江西臨川人貢生王嗣槐浙江錢塘  
人生員許孫荃江南合肥人庚戌進士見任刑部四川  
司郎中徐嘉炎浙江秀水人監生王孫蔚陝西臨潼人  
壬辰進士原湖北糧道參議今候補張瑞徵山東萊陽  
人壬辰進士原河南汝南道副使今候補戴王綸直隸  
滄州人乙未榜眼原江西糧道參議今候補汪霖浙江  
仁和人丙辰進士見任行人司行人王含真山西猗氏  
人丙辰進士侯七乘山西汾西人戊戌進士原江西廣  
信府同知休致夏駟浙江烏程人監生喬萊江南寶應

人丁未進士原內閣辦事中書今候補劉瑞遠順天三  
河人舉人原江南海州知州革職吳任臣浙江仁和人  
生員郎戴瓚浙江錢塘人生員龍燮江南望江人貢生  
李鎧江南山陽人辛丑進士見任順天府蓋平縣知縣  
趙驪湖浙江上虞人舉人陸次雲浙江錢塘人例監考  
定州判朱培浙江人歲貢考定訓導顧鼎銓浙江  
仁和人順天舉人見任山西蒲縣知縣毛升芳浙江遂  
安人拔貢徐之凱浙江江山人戊戌進士見任陝西眞  
寧縣知縣毛際可浙江遂安人戊戌進士見任河南祥  
符縣知縣張英浙江海寧人癸丑進士候選內閣中書

邱象隨江南山陽人拔貢黃虞稷江南江寧人廩生許  
自俊江南嘉定人庚戌進士候選知縣李芳廣河南柘  
城人甲辰進士原山東壽光縣知縣今候補內閣中書  
宋實穎江南長洲人辛卯舉人楊還吉山東卽墨人生  
員黃始江南吳江人生員施清江南吳縣人例監見任  
陝西布政司經歷宋維藩建德人准貢候選州同陸隴  
其浙江平湖人庚戌進士原江南嘉定縣知縣革職申  
維翰江南江都人廩監柯崇樸浙江嘉善人副榜貢生  
候選內閣中書沈筠浙江仁人生員程易江南休寧  
人例監程大昌湖廣孝感人癸丑進士嚴繩孫江南無

錫人布衣許先甲浙江仁和人廩監戴茂隆浙江平湖  
人例監錢金甫江南上海人廩監今中式舉人錢中諧  
江南吳縣人戊戌進士龐塏直隸任邱人舉人周起莘  
浙江蕭山人廩監張鴻烈江南山陽人廩監周清原江  
南武進人監生儲方慶江南宜興人丁未進士見任山  
西清源縣知縣上官鑑山西翼城人丙戌進士原河南  
鹽道參議今候補吳雯山西蒲州人生員程必昇陝西  
韓城人乙未進士原山東棲霞縣知縣革職宋涵江南  
溧陽人例監王方穀直隸新城人貢生馮勗江南長洲  
人布衣趙廷颺陝西膚施人拔貢原鞏昌府文縣教諭

今候補國子監學正徐孺芳浙江仁和人己亥進士見  
任陝西神木縣知縣葉灼棠江南江寧人貢生原福建  
興泉道僉事革職王祚興山西永寧人丁未進士候選  
知縣任辰旦浙江蕭山人丁未進士見任江南上海縣  
知縣汪楫江南休寧人歲貢見任贛榆縣教諭田茂遇  
江南青浦人舉人除授山東新城縣知縣革職黃與堅  
江南華亭人己亥進士葉奕苞江南上海人監生金居  
敬江南吳縣人監生鄧林梓江南常熟人布衣王廷璧  
河南祥符人壬辰進士原浙江寧紹道參議今候補張  
能麟順天大興人丁亥進士見任山東道參議傅展山




東新城人乙未進士原山西道監察御史終養張含輝  
山東掖縣人壬辰進士原四川提學道僉事今候補  
議魏學渠浙江嘉善人舉人原湖廣提學道僉事今候  
補陳宏順天大興人辛丑進士候補主事柯維禎浙江  
嘉善人舉人徐林鴻浙江仁和人廩生毛奇齡浙江蕭  
山人廩監徐咸清浙江會稽人布衣高向台山西翼城  
人丁未進士原內閣辦事中書今候補閭若璩山西太  
原人監生邵允宜江南人貢生已投文赴部而未  
驗到者三員崔如岳直隸獲鹿人舉人李瑞徵直隸容  
城人丙辰進士楊毓蘭河南新鄉人丁亥進士見任湖

廣衡永道參議因稱患病已經行催尙未報有起程日期者十七員應摺謙浙江仁和人布衣張九徵江南丹徒人丁亥進士原河南提學道僉事今候補參議魏禱江西寧都人布衣李容陝西盤屋人布衣顧景星湖廣蘄州人貢生范鄔鼎山西洪洞人丁未進士嵇宗孟江南山陽人舉人原浙江杭州府知府休致張新標江南山陽人已丑進士原吏部考功司郎中降補陝西苑馬寺監正休致吳元龍江南華亭人甲辰進士原工部都水司郎中終養陸舜江南泰州人甲辰進士原浙江提學道僉事休致潘耒江南吳江人布衣周慶曾江南常

熟人辛丑進士原內閣辦事中書今候補主事范必英  
江南長洲人舉人蔡方炳江南長洲人布衣彭桂江南  
溧陽人監生王追騏湖廣黃岡人已亥進士原禮科給  
事中外轉補授山東武德道僉事革職辯復還職候補  
僉事顧豹文浙江仁和人乙未進士原河南道監察御  
史告病回籍已報起程而未赴部投文者十二員李因  
篤陝西富平人布衣王宏撰陝西華陰人監生李大春  
陝西西安人舉人成其愿山東樂安人生員虞兆潢浙  
江嘉興人生員朱士曾浙江山陰人布衣葉芳蔚江南  
崑山人生員陳莢浙江秀水人生員朱鍾仁江南崑山

人生員嵇永福江南無錫人乙未進士原浙江嚴州府推官降補山東歷城縣縣丞保舉湖廣軍前候用曹宜溥湖廣黃岡人恩廕監生潘颺言山東章邱人壬辰進士原吏部文選司主事降調保舉湖廣軍前候用未報起程因地方不符事故未結見在行催者七員章貞浙江會稽人乙未進士見任湖廣棗陽縣知縣孫枝蔚陝西三原人布衣朱昱浙江山陰人布衣張霍福建候官人副榜教習知縣陶元淳江南常熟人監生邵遠平浙江仁和人甲辰進士兄任江西提學道僉事馬駿順天人舉人從未將事由報部者四員鄧漢儀江南泰州人

布衣王昊江南太倉人布衣董俞江南華亭人舉人潘  
藩大江南  人例監見任江西宜春縣知縣丁憂病  
故未試九員李良年浙江嘉興人生員林以畏浙江錢  
塘人布衣張貞山東安邱人拔貢候選孔目惠周惕江  
南吳縣人副榜曹溶浙江秀水人前丁丑進士戶部侍  
郎外轉陽和道葉舒崇江南吳縣人丙辰進士汪懋麟  
江南江都人丁未進士中書陳學夔福建侯官人舉人  
祝宏坊浙江山陰人庚戌進士 戴璐吏  
廢鈔存  
康熙己未保薦鴻博朱竹垞謂皆擅著作才撰鶴徵錄  
未成其時應考者一百三十三人未取名士如法若真

丙戌進士布政使趙進美前庚辰進士河北道田雲甲  
辰進士郎中葉封己亥進士高曾雲丙辰進士常博譚  
吉璉例監同知許孫荃庚戌進士刑部郎中戴王綸乙  
未榜眼江南糧道陸隴其庚戌進士革職知縣閻若璩  
監生李良年生員汪懋麟進士以丁憂未試保舉奏疏  
於吏科庫見之

戴璠藤  
陰雜志

瀛按李良年浙江秀水縣生員

欽定四庫全書提要云初冒姓虞名兆潢故當時  
薦牘無良年名朱爨尊所作墓志僅載其原名而  
未載其冒姓亦偶踈也彙征錄顧張思已未詞科

題名記皆有虞兆潢而無李良年李集鶴徵錄纂輯有李良年而無虞兆潢惟踈脫冒姓一節耳吏牘存鈔於已經行催尙未報有起程日期者十七員下載虞兆潢嘉興人生員又於丁憂病故未試九員下載李良年浙江嘉興人生員是分一人而爲二矣且李良年試而未取列之丁憂病故未試九員中更誤吏牘存鈔之訛舛處如江閩康熙癸卯順天舉人誤作巳酉施清浙江錢塘貢生誤作江南吳縣監生范鄣鼎順治辛丑進士誤作丁未邵允燾誤作邵允宜其他籍貫亦間有訛錯意亦

隨筆所記非盡鈔於吏牘者